

歸
順
道
精
絲
卷

卷之六

卷之六

卷之六

卷之六

卷之六

卷之六

卷之六

卷之六

卷之六

歸順直隸州志卷三

山川志

附水利

物產

康對山殿撰武功志所載只梁山山雍水一水其簡可師也而詞章則所登較多其自蘇屬國以至瓌頌父子下逮蘇若蘭璇璣圖亦皆採入誠以言之無文行而不遠又况如許公之大手筆乎今州志山川已不能如前人之簡而文又不足以張之但屢加刪汰亦欲使一拳一勺之可觀如全鼎一鸞之可嘗而已

山

鳳凰山在州北二里山頂有石峨如鳳冠兩翼夾輔狀類飛

歸州直隸州志
騰故名竹木森茂百鳥叢集惟鷹鷂二種未嘗至實爲一州
之領袖

獨秀山在州署後一里許由鳳凰山跌頓而下爲來龍度脈
之山恰如頂上圓光最爲秀拔

獅山在州南二里其形如獅橫臥江心龍潭黎樓二水至此
合流一州水勢藉此關鎖又有天葩文星爲州治向山

金山在州北二里許形如覆鐘社稷諸壇列築於山之陽

賓山在城東北二里挺然獨秀林木聳翠潭水潌洞山腹有
洞前後相通中建佛刹名曰普壽供釋迦大士康熙六年蜀
僧西來意所建道光十七年闔州紳耆由後洞之左開路疊

石數百級直上山巔建三層塔於其上名曰凌虛塔可以登高望遠二十九年州人何福祥等重加修治於後洞作亭以祀張神仙重建前洞挹翠亭並半山亭知州顏嗣徽聯云借枕偶來酣睡客觀碁時有爛柯人

太極洞在城西五里山小而秀爲州人彭紹英別墅洞口形像太極圖故名右有四象亭知州李憲喬有詩及贊刻石壁間知州顏嗣徽聯云石破天驚問誰鑿開混沌雲油雨濩推此澤潤邊荒

蒼巖山在州東十里卓立田間其形如筍高不可仰視下有巖洞相傳有仙遊其上足迹宛然土人有登其巔者云有柑

樹結實可食不可懷歸

騰煙山在州西十里一山突兀峭壁環其三面下有瀦水深數十丈流分三派各長一二里復伏於山穴內相傳中有神物每當水發則流沙漂石居民多沈銅鐵屑以鎮之

排磨山在州南三十里峭壁百餘丈下有泉水流入蓮塘峯巒秀麗林木幽深

三台山在龍臨團山上有三泉水流山下鄰近村田需以灌溉

嶺衛山在州西一百五十里其山高聳綿亘橫隔越南言其能爲一州之衛故名

照陽山在州西北一百五十里羣峰聯絡惟此突然高聳峭壁險巖無路可上朝旭東升正照洞口由洞穿出一徑即小鎮安地天然界限故名照陽關山亦因關得名洞中有石土人常以占歲石潤則豐燥則歉多有驗

仙巖在舊州啼肱村旁舊傳張神仙名瑯旺修煉得道挾巨石如飛即此

飛鶯洞在郎家墟北六七里懸崖數十丈甚堅固

答書巖在郎家墟東十五六里左右兩山排列河道居中懸崖絕險只有一路可通天保向武養利等處

次山閣在郎家墟東二三里左右崇山峻嶺中有大石橫亘

高三四丈寬五六丈下有河水流山背落下一丈八九尺
常聞水聲儼若松濤右有石門爲往來行人必由之路舊有
玄天廟後添建閣風景頗佳州人童九臬題有詩序

紫壁山在舊州南三里明季有人在半崖刻紫壁樵歌四字
冰巖在榮勞墟南二十五里中常有冰結取出不久則化成

水

鎮邊縣

感馱巖又名磐石巖在縣治北二里許方輿紀要稱鎮安崗
在感馱巖側皆名實相符所謂九州有時而移山川千古不
易者也此外附郭左右尙有獅山虎山象鼻山螃蠏山均屬

象形惟肖關鎖緊轆亦一方之秀也

索峯在縣治北山勢巖峩聳拔

末嶺在縣治東北山勢綿互外接雲南寶甯縣界

白藤山在縣治西北氣勢磅礴雄偉

古巖在縣治北一里巖口幽深林木陰翳水由巖出下流入

於石穴上有草亭

馬黃山在縣治西七十里勢如棊盤方正石色純黃中橫黑
痕如帶

者月山一名遮月山在縣治西八十里高聳屏列如城頂平
可居百家中有一路可通

湖潤司

將軍挂印山在寨西北六里山勢尊嚴形如將軍大座後一小坡似印故名

月山在寨西北八里山有紫白色紋形圓如月旁有青石環抱似青雲扶月故名

下雷土州

筆架山在土州署後一名崇壽形如筆架樹木叢森爲下雷之主山

天關山在下雷東北一里山頂有五峯排列挺秀

地軸山在下雷東南一里上有三峯形如誥軸

翁蔚山在下雷東南三里中有一洞豁然開朗三峯遙對建
有魁星閣文昌廟

川 水利附

歸順江源出咻渠雷經渠洋福崗流人天保縣界

龍潭水州東北六里源自山下石穴湧出長流成川繞州而
南旱澇不見盈涸又小龍潭在山之陰深不可測地穴潛通
合流由頻崗隘入越南上琅州界附郭華崗頻崗一帶腴田
皆資灌溉知州顏嗣徽聯云舉手欲招雲表鶴豪吟恐震水
中龍

鷺泉水州西十五里源出平地相傳昔有楊媪拾得二卵養

出神鷺攪田間溝洫成潭深十餘丈闊數倍之泝流成川上
有小山林木蒼蔚極爲幽勝其水東南合龍潭水每年上巳
日村民請官禱祭以祝豐年泗梨舊州魯利一帶田畝皆資
灌溉知州顏嗣徽聯云清流激湍修稷正暮春天氣鶯穿魚
躍憑欄助太守吟情

樓黎水州西一十五里出山下經新墟隆暖諸村繞城西南
流又哺漏水龍拱水俱自城西入於樓黎龍潭合流出頻崗
所經一帶田畝皆資灌溉

武平河自州東流出天保縣南

邏水從郎家墟經五番足邦下崗流至峩漕隘出下雷

佈磴水即坡豆水源出坡豆况村經壬莊頻崗流出越南上
琅州平泥崗

隴那水即隴那水源出榮勞經典屯村至屯隘出越南上琅
州逐招崗各村田畝均資灌溉

蓮塘在州治南九十里壬莊那崗村塘中水石間自生蓮種
每當花時一碧漣漪亭亭淨植自古及今未嘗歇絕天然名
勝

流珠水在州東南八十里源出邕遠山懸崖百丈水循崖瀨
湃而下望如白練濺沫流珠南流經湖潤寨西下雷州東合
邏水

立黃水源出下崗經峩漕隘入湖潤寨

凌弄潭在龍臨墟其水每日兩三潮不等潮落聲響如笙鐘
鏜鞞新人往潭汲水水每隨步級上下至今猶然

清濁水在壬莊托秤巖下左清右濁四時常流

鎮邊縣

勞水源出縣南勞山北流經城西受東南一小水又北大魁
水合弄內水自西來注又北過魁恆村吉列水自西北來注
又東北伏入甘巖至岵歇村復出又東南受耶旺村小水又
屈東北入雲南土富州界

德窩水源出城南山穴中東南流經德窩墟弄崗墟東至叫

林村經百合墟南至百南墟西北苟華水合坡芽百都者合
諸水自西北來注又南經那馬村東至別諗隘入越南界
那摩水自越南流入縣西南境東北經那坡墟西良墟東屈
西北坡酬水自北來注又西北經樓堡村西入越南界
末山水源出城北末山西北流入雲南土富州境

湖潤司

馱來溪即河來水又即邏水由州境崑漕隘流出寨西一里
吉河水北來注之匯於南陽橋東流至那理津又曲折經淺
沙潭石鼓潭入下雷州界

馱光溪即契陵泉自寨之西北經石壩大壩合小西湖水匯

於龍潭經多福橋東流至那理津匯河來水流入下雷州界

下雷土州

西北河即邏水自州境湖潤寨東南合北河水又東南受西
來一小水經土州署東又東南經苑洞墟崇厚墟北與西南
河合流入安平州界

西南河自越南東流入境西南境與越南左右岸分界又東
南經黃甲隘又東北至黃防卡安平界又東北經石龍墟與
邏水合

物產

稻不黏者稍有水禾旱禾之分惟舊州產爲最軟熟又一種

若棉米顆粒尤大味勝於他處

糯其性黏可以釀酒說文云沛國謂稻爲糯秔稻屬也字林云糯黏稻也秔稻不黏者粵西之糯有黃皮糯大糯香糯鈴子糯州屬所產圓大光澤名珍珠糯最佳

杭江南呼爲秈有早中晚三收黏者爲糯不黏爲秈俗名大米又名晚米

玉米俗名苞穀歸順山野徧種以其實磨粉可充半年糧食此地秋穫後良田並不種麥畚地更少惟恃玉米一造若雨暘不時貧民卽有饑饉之慮其實高下田畚皆可種麥割麥後再向田疇插秧畚地種苞穀收穫較廣糧食必漸充足力

穉者當知所變計焉順俗情農自安水利皆未講求栽種亦不合法特附識之

蕎麥大小二麥之外又有此種亦呼甜蕎赤莖綠葉實有三稜俗謂之三角麥易長易收諺所謂懶漢種蕎麥也開白花白居易詩蕎麥鋪花白即此又一種苦蕎野生

薏苡按嶺南雜事注薏苡一曰薏米亦曰玉珠子越南人呼爲薏珠食以代米或雜米中熟之故諺曰食米得薏苡一米二從郎二米儂只一薏又曰郎是薏珠兒儂是薏珠子自憐同一珠甘苦長相似

芋按芋之美者首黃芋次白芋次紅芋皆小惟南芋色紫

生沙中甚可食而白者尤良粵西以荔浦芋爲最佳大者可四五斤作羹食之能調中補虛歸順所出雖不如荔浦然亦滑膩與各屬所出甚異

諸按粵東多諸順屬山中亦生纖細而堅實者曰白鳩諸似山藥亦曰土山藥最益人大如鵝鴨卵花絕香其皮或紅或白大而拳曲者曰番諸皆甜美可食蘇長公稱海中人多百歲由不食五穀而食甘諸其番諸由呂宋來味尤甘美恐長公尙未見也

枕榔木其實磨以爲麪可充食品能治熱痢惟鎮邊下雷一帶所有之木性堅勁如竹紫黑色有文理士大夫截爲楹聯頗

稱精雅

樟木質堅理細而芳香特甚

椿木堅實光潤肌理皆帶赤色莊子所謂八千歲爲春秋者也趙甌北道經下雷稱爲樹海賦長句美之州屬嘉植何啻千萬書不勝書而前志稿反遺此三種是買櫝而還珠也思儻木堅實漬鹽水中百年不腐順屬極多

楓樹似白楊圓歧有脂而香枝善搖故字從風葉作三脊霜後色丹謂之丹楓五嶺間多歲久則生瘤瘿一夕遇暴雷驟雨其樹贅驟暗長三五尺謂之楓人越巫取之作術取之以法則能化去

榘木本名楮中白汁如乳各屬皆出鄉人均搗皮爲紙
鐵力木一名石鹽一名鐵稜文理堅緻歸順鎮邊所產尤多
土人名爲杅木凡木皆蠹蝕惟此木不腐嶺南瑣記謂木力
僅可百餘年未足信也

竹通志謂大者可屋嫩者可紙州屬以此爲大宗各處村寨
青森蒼蔚夏如琅玕近水之區尤爲稠密亦可稱竹海也又
有箭竹青皮竹茅竹虞衡志名貓竹貓字無意義或即茅字
之轉音歟

笏竹即棘竹又名箭竹又作筋竹考笏即筋之古文酉陽雜
俎謂竹節皆有刺數千莖爲一叢南夷種以爲城捍不可拔

嶺表錄異謂自根橫生枝條輾轉如織雖野火焚燒只燎細
枝嫩條其筍叢生轉復牢密邕州舊以為城蠻蠻來攻竟不
能入是一種而數名州屬隨處皆有前於各關隘皆樹笏竹
為柵深塹其外以禦南越趙甌北有笏竹歌紀之
方竹出歸順體如削成其節直上用以作杖甚佳

三七其莖三極七葉故名三七前以田州產者為最良今苗
裔盡遷於州屬之榮勞南坡一帶地方矣服之去淤生新能
治跌撲損傷胎產諸證

芭蕉根大如車轂葉長七八尺花如臂掌實隨華結每華一
闔各有六子先後相次子不俱生花不俱落一名甘蕉交廣

醫有之三輔黃圖曰漢武帝元鼎六年破越南建扶荔宮以
禮所得奇草異木有甘蕉二本

檉花又名木樨州境最多花開茂密清香可愛

甘蔗皆畦種最困地力荻蔗以蜀及嶺南者勝州屬甚多味
極甜美

弔蘭根懸生木上花葉如蘭

石斛一名黃草佳者名金釵可入藥品

七葉一枝花產於邊地神農本草未收根如黃精氣味甘平
無毒能滋陰養血於咯血便血諸證尤宜

落花生俗名人參豆落土中始生嶺南所產最廣州屬亦不

少以之榨油名生油其麵名生麵與浙江黃豆相等蓋亦土宜使然也

茶油子如栗榨油甚清可食點鐙經久棉花子油農家多食之點鐙暗

雪梨惟安德舊州二處極佳可與膠州產者爭勝真州屬佳果也

核桃一名胡桃又名交桃歸順所產者最多

荔枝龍眼州屬皆有惟實大而肉薄不如梓產

石榴柑子橙子金錢橘佛手柑州屬所產俱佳

蘋州屬溪澗皆生蘋花望之如落梅水流花開清波微動頗

有瀟湘之致

錦地羅廣西慶遠柳州鎮安各府皆有惟歸順所產者最佳
用酒醋研之可治諸瘡毒

白菜油菜色味俱佳不減膠州菜油菜子可以榨油點鐙經
久

大芥即蕪菁又名蔓菁一名諸葛菜又名馬王菜相傳馬殷
所遺

芥蘭菜甘辛如芥葉藍色鍊之能出鉛又名隔藍僧云六祖
未出家時爲獵戶不食葷血以此菜與野味同鍋隔開煮熟
食之故名

大頭菜微曝乾漬以醬貯之甕中俟其醃熟生脆甜香可充
食品並可遺遠

黃鸝賓山樹林陰蔚時飛上下金采眴目唐人詩二月黃鸝
飛上林洵先得我心也

鷓鴣嶺南尤多臆前有白圓點背上間紫赤毛其大如野雞
多對啼南越志云鷓鴣雖東西同翔然開翅之始必先南音
自呼杜薄州一云呼鉤輞格磔李羣玉鷓鴣詩云方穿詰屈
崎嶇路又聽鉤輞格磔聲

山羊出左江大者百餘斤小者六七十斤跳越山頭如飛鳥
非千百人不可得一須逐入籠中張網捕之生得剖者心血

爲上餘血亦佳如跳墜山谷跌死者速剖之其血已凝若遲
取則仍甦復跳躍去矣欲識真假取雞血半杯投山羊血一
粒米過宿血變成水或以久凝臭雞血一塊投入山羊血過
宿血變成鮮血以此驗之血可治撲跌傷損及諸血證以一
分許調酒飲之神效州屬皆出

石羊血能療跌打損傷羅浮記云石羊色黑類人家羊而躑
捷其角燒紙爲火罐能收頭風其皮作褥可治筋骨疼痛
猿有三種金絲者黃玉面者黑純黑者面亦黑金絲玉面皆
難得或云純黑者雄金絲者雌又言雄能嘯雌不能也猿性
不耐著地著地輒瀉以死煎附子飲之即愈猿子能抱其母

山川正雜小元
三
牢不可折人取之射殺其母取其子子猶抱皮不釋獵猿者
可以戒矣登木好以兩臂攀枝上不甚用足終日纍纍然

熊其一種人熊乃一長大人也被髮裸體手爪長銳常以手
爪劃橄欖木取其脂液塗身厚數寸用以禦寒暑敵捕噬是
獸也力能捕虎每蹠蹠而行道遇一木根必拔去而後行登
木而行橡栗必折盡而後已在山中遇人則執人手以舌掩
面而笑少焉以爪抉人目精而去熊多力性輕健能攀援又
有馬熊豬熊狗熊數種不一其狀膽最貴重性寒可入藥療
疾掌味極鮮美須烹煮得法

麝麝自邕州溪崗來者名土麝氣臊烈不及西番比年西番

多偽雜一臍化爲十數枚豈復有香土麝氣味雖劣以不多得爲珍貨不暇作偽入藥尤有力

鰕魚肉白而鬆可爲諸魚之冠以龍潭鵞泉所產爲美二三
月尤肥真桃花水漲鰕魚肥也

山臙本鼈類但穴於泥中州屬所產尤爲肥美

土錦一名獐錦以絲雜棉織之五采斑斕葳蕤陸離真杜詩
之海圖波濤天吳紫鳳也州地所織較厚鎮邊尤軟美可珍

鎮邊縣

木棉樹大可合抱高數丈葉如香樟瓣極厚正二月開大紅
花鮮豔照人花開時無葉花落後半月始有新綠結子老則

折裂有絮茸與蘆花相似可以裝被褥凡中鴉片毒者用木棉花六錢燒灰加食鹽二錢將滾水攪勻沖服兩刻之久即吐出中煙汁多者加服二三劑無不愈者又解鉛粉砒霜蠱螫野菌諸毒如前法服之但減去食鹽耳州境亦多

榕樹如冬青枝翠拳曲繁密如藤垂下及地便生根節橫枝連理高大可覆數畝奇離古怪衙署多植以爲蔭然木中材用莊子所謂以不材而壽者也州境亦有

避蠱木土人製爲箸云能避蠱故名

木瓜形如宣木瓜而不香由青而紅剖其瓢如黍米東粵名萬壽果用以雕花作盤釘亦可作菹蜜漬鹽醃均可

百合一名蒜腦諸根如大蒜味如山藷磨成粉雪白光潤可充食品然不如全州之產

山楂其實甚大清香微酸以之作糕可充食品並可遺遠州屬所產極多

金竹筍有甘苦二種又有冬筍當冬而生較春生者味尤香美

湖潤司

蛤蚧湖潤所出甚多他處多在山巖此地牆壁皆有且其爪只有四茲獨有五

下雷土州

金竹下雷東个賴甲一帶最多竹工破之爲簞可以遺遠
七紙下雷東苑甲隴檀隴乃二村所產

歸順直隸州志卷三

建置志

城池

廨署

學校

書院

壇廟

關隘

津梁

樓亭

塚墓

建置之最大者莫如學校然至聖先賢事蹟並歷朝崇奉封號祀典已昭昭如揭日月以行非一州一邑之志所得私也余志遷江以歷任有能留心培植學校教育士子者為報最此外則僅紀黌宮勦建之年月記倡始經營之姓名以及兵燹後重修之人而已茲閱州志稿亦踵各郡縣志書之繁文因概加刪削此外城郭壇廟亦倣此體例以歸簡要

城池

州治舊城在今西南二十五里元時置後廢爲洞明宏治九年復建周圍一里四門無雉堞濠塹天啟七年被交夷莫敬耀攻破日久頽塌移計甲作州治築土爲牆僅圍衙署

國朝雍正七年改流乾隆二年奉文建立甌城嗣因土性不宜燒甌不成改建石城知州路聲聞領帑興工十一年內奉文停緩至十八年復奉文催建知州王文煥領款復修二十三年告竣爲門三東曰迎恩西曰西成南曰綏遠三十四年知州何復善始開小東門曰朝陽計城高一丈八尺厚一丈二尺周圍六百一十二丈濠濠上舊架木板爲橋嘉慶十一年知州蔡星韶因木板朽壞發以長石條

鎮邊縣

明以前治鎮安崗舊城在感馱巖下基址無存後改流官城垣尙未修建

解署

州署原在舊州明天啟間移建計甲地方結茅爲室

國朝雍正七年改流十一年知州駱爲香奉文建大門三間土地祠三間儀門二間大堂三間書吏房八間二堂三門左右廂房各二間後宅三間左右廂房各三間書房二間監獄四間嘉慶二十四年知州宋慶和添置庫房三間咸豐同治年間燬於兵燹同治十年知州潘英章捐廉並勸捐紳耆修

復未竟解任光緒二年知州倪道衍始竟前功後宅改爲五
間添建花廳五間餘悉如舊知州黃詠沂添設鼓亭知州王
方田添立旗竿轅門規模始備

州同署在州署西南本吏目署雍正七年改設州同十年移
駐舊州另建州同署乾隆十一年湖潤寨土巡檢故絕十三
年以歸順州同移駐湖潤寨署三十年奉文裁州同

學正署在文廟之右雍正十一年設學始建歲久漸敝嘉慶
十六年學正全三省集闔學重修講堂二十四年學正劉啟
元政修大門爲明倫堂移大門於路口道光十年學正程垣
添修住宅十八年學正周丕顯勸闔學佺生等捐建明倫堂

三間書房一間歷任增修體制尚備

吏目署舊在州署西南雍正七年裁吏目改爲州同署十年復設移建州署東同治年間燬於兵火今僅遺址在焉現寓公館

湖潤巡檢署乾隆十一年土巡檢岑祚桂故絕十三年以州同移駐三十年裁州同改爲巡檢署兵燹後均燬無存

下雷州漢吏目署在土州署右後移建北門內兵燹後均燬無存

下雷土州署在筆架山之西明洪武年間刳建康熙二十八年土州許紹武重修同治初年被賊焚燬遺址尙在土州許

自州置為少
裕謙於舊署右旁重修一所三進舊署未全修復

鎮安協署在州治右均燬無存今以呂祖廟作行臺

都司署在州治南焚燬無存今寓公館

千總署在州治南焚燬無存今寓公館

把總署在州署西焚燬無存今寓公館

鎮邊縣

舊廳署在大街中建於乾隆三十三年同治二年土匪吳亞

終焚燬今改為縣移治鎮陽書院添建頭門一座東西監房

各一間因陋就簡不成體制

典史署尙未建置今寓公館

守備署在縣治北校場左雍正二十年建今燬無存寄駐文
昌廟
分防千總署在縣治北今燬無存

學校

文廟在州治東雍正十一年知州駱爲香奉文勅建乾隆四
十七年闔州士庶呈請知州陳章重修大成殿東西廡大成
門名宦鄉賢櫺星門禮門義路照壁等處道光八年因四面
圍牆倒塌崇聖祠及東西廡漸敝知州項國楠捐俸率闔州
人士捐貲興工重修並添補照壁甃牆一週規模如制

光緒十六年知州黃詠沂飭聚秀局提公款購置祭器錫香

案五件錫簋十三件錫簋十四件錫劍十二件錫邊豆共壹
百件錫著罇五件錫酒樽一件錫犧象樽共二件錫爵二十
八件又聚秀局前置錫香案燭臺花瓶兩付共十件重壹百
五十斤

節錄光緒十三年禮部議覆兩廣總督張之洞改撥歸

順鎮邊學額奏疏

今據兩廣總督張之洞等以小鎮安通判改爲鎮邊縣該處
應試童生向入鎮安府學者今爲歸順直隸州屬縣自應另
設學額擬請歲科每試取進四名等因是鎮安通判既改爲
鎮邊縣爲歸順直隸州所屬自未便仍歸鎮安府考試惟檢

查廣西存部學冊鎮安廳向無學額其鎮安府學額十名向於各屬取進文生分撥由鎮安廳撥入者每屬僅止一名至多不過二名兼有未經取進者則該處應試人數不多已可概見且歸順州原有學額四名每屆撥入鎮安府學者又三四名不等今既升爲直隸州自未便仍占鎮安府學之額則該府學額數未免過多所有鎮邊縣學額應請仍在鎮安府學內撥出二名作爲該縣定額鎮安府學仍留學額八名足數分撥仍如該督所請歸順直隸州及鎮邊縣均就近附鎮安府考棚歲科並考該縣生童卽由歸順直隸州學正兼管無庸另設訓導以節糜費其武童歲試取進四名兵部查廣

西鎮安府武學原額十二名今該府所屬小鎮安通判既改
爲鎮邊縣請添設武學額四名查文學額既經禮部議准由
鎮安府劃撥二名歸入該縣取進其武學額亦應由該府撥
出二名作爲該縣定額毋庸另行添設其餘武學額十名仍
作鎮安府學定額以歸畫一

節錄光緒十四年禮部議覆廣西巡撫沈秉成奏請添
撥鎮邊廩增並添撥湖澗下雷學額奏疏

禮部查學政全書內開廣西歸順州學額進四名廩生二名
增生二名四年一貢今廣西歸順州升爲直隸州改設鎮邊
縣爲歸順州屬前經臣部議奏於鎮安府學十名內撥出二

名作爲該縣定額鎮安府仍留八名茲據廣西巡撫沈秉成以鎮邊縣旣設學額請仍於鎮安府學廩額內撥出二名歸於鎮邊縣自係爲慎重考試起見惟查該縣甫經設學僅有學額二名茲卽添設廩增二名將新進附生一經考試卽儘數幫補未免過優擬請援照天保縣成案俟歲科輪試二次後由鎮安府學內撥給廩增各二名定爲鎮邊縣廩增額新補廩生俟食餼十年後方准出貢嗣後出貢年分亦照歸順州之例四年一貢該縣未設廩增已前仍由取進附生認保以專責成至原奏又稱湖澗寨下雷土州各童不得再應府試府額尙留八名仍係過寬請於鎮安府學內撥出二名併

入歸順州爲湖潤下雷登進之路檢查該省存部學冊鎮安府額向俱酌撥歸順州及湖潤下雷等處文童取進該州旣升爲直隸州又將湖潤下雷等處撥歸州屬俱不得再應府試府額八名所留過寬係屬實在情形自應再行酌撥擬請由鎮安府學額內撥出二名並原額四名同治五年巡撫張凱嵩奏請捐輸加定額一名定爲歸順州學額七名嗣後湖潤下雷等處文童均歸入州屬各童內考試一體憑文取進查歸順州原定武學額四名同治五年巡撫張凱嵩奏請捐輸加定額一名共取進武學五名今據該撫請由鎮安府撥出二名自應准如所請作爲歸順直隸州武學定額七名

光緒八年廣西巡撫倪文蔚奏請自乙酉科起鎮安泗城另編字號分科輪中舉人一名歸順今改爲直隸州舉額仍附入鎮安

考試棚費一項道光二十二年泗鎮兩府合建奉議考棚闔州簽捐存留錢六千串發餉當生息爲考試棚費兵燹後無存舊志光緒六年知州王道南稟提吏目豬判錢每年七百串

作棚費嗣歸順州改升直隸州搭棚鎮郡棚費議加十六年知州黃詠沂加提豬判錢每年三百串合前共成一千串除二八兩月歸屠戶頭收作祭祀之用其餘按十個月攤算加六二五伸銀計每月由吏目解銀六十二兩五錢解州辦考

存州庫俟逢考期由州合縣共提銀一千七百六十兩移送
鎮安府以資棚費之用知州黃詠沂稟立章程四條已詳載
賓興冊內入下雷士州每屆應解州試考費銀伍拾兩

書院

附膏火經費

賓興經費

聚秀局經費

義學

道南書院在州城東文通街乾隆二十七年知州黃叔顯勸
建講堂三間學舍及頭門三間嘉慶二十四年知州宋慶和
捐廉增修中院三間道光二十九年舉人何福祥捐後院地
基一幅偕闔學增建後院三間及兩廊各三間又建魁星閣
於院中而以中院祀文昌及庖湍門廡一切俱備卽以講堂
作州試考棚道光十一年知州項國楠捐廉添建左右長廊

一間又建廂房二間講堂前捲棚一座並置鐵力木號棹登
各二百張光緒二十四年經聚秀公局概行改置石號棹知
州顏嗣徽聯云朝廷詔中外開舉特科望諸君策追董相論
擬賈生潤宏猷而光三管刺史奉敕命撫臨邊徼幸此地井
湧甘泉亭名喜雨慶豐歲以答九重

道南書院向未延請長院道光十九年知州項國楠始請長
院訓課二月初旬考甄別分取內外課住院肄業歲支書院
公項錢一百千半作長院束脩半作生童膏火咸同年間歷
亂廢弛光緒十七年知州黃詠沂復延請長院十八年知州
蕭憲章更定章程長院束脩百金聘敬四元節敬各四兩每

年二月開課十一月停課共十個月每月會課二次官課捐廉獎賞膏火錢定數不定額師課無獎賞膏火錢定數不定額學中一人司其出納每年給薪水錢六十千文又每月官課送州署閱卷束脩錢五千文均在膏火項下開支

鹿萃文社光緒二十年知州王方田勅立逢大比之年每月於書院會課外加課一次等第無額獎賞捐廉優給

書院膏火經費田嘉慶六年知州任忠庾捐廉率闔州捐置議定章程凡官民所捐錢不許積留放債生息只准買田卽過書院戶口田契存官每年收糶租穀及納糧發給膏火等事以學內公正者司理年底將收用數目繕列清單一呈州

官一貼書院今將歷年買置膏火田糧銀畝數列號並收租穀數目詳列於後

嘉慶六年知州任忠庾捐廉並率闔州人捐款買置膏火田畝自第一號起至五十號止又自前任知州蔣槐午捐廉買置膏火田畝自五十六號起至六十六號止每年總共應收得租穀八百八十二頭

又於同治四年歷年共添置田畝自第一號起至二十八號止每年應收得租穀四百八十三頭

又逆產充公膏大田畝自第一號起至十四號止每年應收得租穀二百三十九頭

皇川直隸州志
又於光緒二十三年添置田一號又二十四年添置田一號
每年共應收得租穀四十一頭

謹案書院膏火田每年總共應收得租穀壹千陸百肆拾
伍頭共應完糧銀貳拾柒兩柒錢玖分玖釐所有田畝數
目坐落地名並完糧戶口已詳載膏火簿內另刻成本一
存州署一存公局其餘分存各紳家藏

書院舊置膏火公屋間數列號自第一號起至十二號止計
一十二所坐落地名詳載膏火簿內

書院賓興經費同治癸酉年知州潘英章倡捐廉銀並發印
簿率闔州殷戶量捐集有成數置買田業年收租穀除納糧

外爲士子賓興經費鄉試赴省量人數分給舉人會試拔貢
朝考臨時酌議以聚秀局紳經理其事今將田業糧銀並收
租穀數目詳列於後自第一號起至十一號止每年應收得
租穀壹百八十七頭

又於光緒十六年知州黃詠沂捐廉置田一十二畝每年應
收得租穀三十頭

謹案賓興田糧編入道南書院膏火項下戶內完納不另
立糧戶每年共收穀二百一十七頭應納糧銀三兩六鈔
五分六釐如所入不敷所出准在膏火項下開支

聚秀局經費同治六年知州瑞齡捐廉並闔州捐存留錢三

千串開設聚秀試典歷年成本共存錢六千串經知州黃詠沂稟立章程四條仍發聚秀公局承領按息一分每年息錢七百二十千文三年共息錢二千一百六十串以公正紳士經理出入並將收支一切數目按季列摺報州存案以此款息銀爲蘭州文武新進童生紅案結費分年按季攤送儒學所有詳細章程另列賓與簿內以備考查

蒙養義學設於道南書院內知州蔣槐午捐廉買田在吞幕村每年送先生館穀壹百二十頭在膏火項下開支

節經樓三間在州前大街聚秀公局內光緒十文年知州黃

詠沂改建藏巡撫馬丕瑤奏頒各省書籍暨早年書院公置

書籍共若干卷所有書籍目錄另刻有簿記每年津貼藏書樓司書薪水錢二十千文在聚秀公局經費項下開支

書院租穀倉一座三間在州前大街舊慶祝宮地道光十九年闔學公建

鎮邊縣

文廟在縣治南街乾隆三十一年通判劉思誠勅建道光九年通判郭兆泰重修同治三年土匪吳亞終焚燬僅存後殿至同治十年通判蔡達卿擇地於縣署旁建大成殿及兩廡現在興工脩葺

訓導一員卽歸順州學正兼管其生童附鎮安考試科歲並

行歲考取入二名科考取入二名廩增各二名四年一貢武
童歲試取入二名詳載總督張之洞巡撫沈秉成奏疏
考試棚費一項光緒十一年知縣張師仲稟請在各墟收豬
判以爲辦考棚費之用每年約收錢四百四十千文內每年
津貼典史錢一百八十千文經營紳士二人每年薪水錢各
二十千文除津貼薪水外每年存錢二百二十千文三年共
存錢六百六十千文一五仲銀四百四十兩每屆歲科試由
縣申解州署棚費銀四百兩解費銀四十兩儘數開支

書院

鎮陽書院在舊廳署東道光十二年通判周三錫建咸豐十

年通判韓第梧重脩因縣署焚燬移駐於此

湖潤司

每屆科歲兩試備造文章姓名冊結申州與下雷共取入二名如無佳卷則由州學選取不作定額下雷土州其考試與湖潤同

壇廟

山川社稷壇在州城東門外雍正十年建

風雲雷雨壇在州城東北金山下雍正十一年建

先農壇在州城東門外雍正十一年知州駱爲香建年久頽圯道光九年知州環國楠重修

武廟在州城南初係營伍官弁建道光十五年闔州重修添
建鞏橋戲臺道光二十五年闔州文武軍民捐建後殿三間
後殿今燬

文昌廟在道南書院初設在講堂中後移於中院奉祀一在
懷遠樓上

城隍廟在城東門內雍正十年駱爲香建嘉慶五年知州任
忠庾重修增建戲臺道光六年知州任士謙總戎王雄郭朝
鳴相繼增葺兩廊捲篷大門並新神像

龍神廟在城東北六里雍正十一年知州駱爲香建乾隆二
十五年知州黃叔顯重修後傾圮嘉慶十七年州人羅中亮

等重修二十一年知州宋慶和增修安湖亭及左右旁門並東西兩廊光緒年間州人增修嵌瀨亭

火神廟在城東門外慈雲寺左道光二十七年知州施鳴盛重修

北帝廟在西門外道光十一年知州項國楠建

呂祖廟在州治南咸豐十一年建

廣福廟在東門外金山下咸豐七年建附有張天宗神座

花王廟在小東門外未建廟前城內小東街一帶常有火警

堪輿家謂城外大魚塘空曠無蔽街中不無風衝之虞宜建祠奉神以庇佑因是首事何其恭蔡日盛等率閩州人捐建

嗣後居民均獲神庇人安物阜知州李憲喬有文紀之並親書匾額此外尚有觀音五顯天后玄壇各廟在附郭城外

節孝祠舊在州署之右雍正五年建厥後日久頽敝未修咸豐三年州人黃其縉稟請地方官願捐貲以爲倡重修移在城東道南書院之左並建孝子祠祀州人李子叢咸豐四年告成知州克順吏目蔡鴻遵均有題額

昭忠祠在甘塘街光緒二年知州倪道衍建一在大東門外五顯廟右一在小東門外廣福廟右

厲壇在城北謹案春秋傳曰鬼有所歸乃不爲厲厲壇之設祭無祀孤魂也

鎮邊縣

山川社稷壇在 治南

風雲雷雨壇在縣治南

先農壇在縣治北螃嶼山下左祀開疆闢土岑公神座

武廟在縣治南街康熙戊寅年建乾隆年間重修

文昌廟在縣治北街咸豐四年燬於兵燹同治二年復建光緒元年通判文星昭重修

城隍廟在縣治北街乾隆三十六年通判劉思誠建五十四年通判愛星阿重修

東嶽廟在縣治北四里許光緒十九年知縣彭光輔率紳民

重建頭門兩廊

龍神廟在縣治東靈里巷石壁之中後有巖祀觀音

火神廟在武廟左旁

北帝廟在縣治大街後進建粵東義祠祀粵東流寓義士
財神廟在縣治大街

三官堂在縣治二里許

魁星閣在縣治南

華光廟在武廟右旁

觀音廟在武廟右旁後殿祀花王神座

岑公祠在縣治北街祀土官岑氏乾隆三十六年通判劉思

誠建五十四年通判愛星阿重修

昭忠祠在縣南祀通判汪桂吳夢桂潘昕及陣亡軍士後進
祀節孝婦女

遺愛祠在感馱巖右祀通判汪應綬沈廷獻呂克順貴十齋
知縣左秉堦之位

丹桂塔在縣治東北光緒二十二年建

厲壇在縣城東北

湖潤司

城隍廟在街西嘉慶二十四年闔街紳民共建兵燹後漸敝
光緒十一年管帶李全忠合紳民捐貲重修

自川...
關帝廟在街西北嘉慶二十四年闔街紳民共建

文昌閣在街東二里道光三年闔街紳民共建年久漸敝
伏波廟在街東二里嘉慶二十四年闔街紳民共建今燬

下雷土州

關帝廟在土州署東雍正四年土官率紳民重修日久頽敝
光緒年間重修

城隍廟在土州署南康熙四十九年建乾隆二十五年土官
率紳民重修日久頽敝光緒年間重修

北帝廟在土州署東乾隆十九年土官率紳民建兵燹後燬
光緒年間重修

關隘

下雷起

凡隘卡 雙行 左書華字 右書洋字 以下皆同

下骨隘

礮台一座

分統營務處參將張開成駐紮

黃傍隘

黃隘

礮台一座

本村卡

亭嵩隘

連隘

礮台一座

隴里卡

吞尤卡

隴莛隘

審村卡

湖潤

黃懷卡

黃惠卡

黃平卡

桐隘

馱野隘

礮台一座

歸順

嘯透卡

屯軍山

吐枯架卡

弄英卡 礮台一座

黃襟口

黃漢卡

黃懷卡

打凌卡

頻崗隘 礮台一座 外委一員駐防

枯敏口

壬莊卡 左營外委一員駐防

枯枝口

枯般口

枯龐隘

管帶健字前營守備陸榮廷駐紮

黃袍口

磨弄口

大石巖口

礮台一座

排底欄

叫貴口

叫啗咻口

隴那嶺

馬德卡

屯隘 右營外委一員駐防

窠龐口

隴送口

打邏口

吞朋卡

哂嘈卡

弄江卡

隴邦隘

分統鎮南各營副將黃雲高駐紮左營把總同駐

隴勿嶺

皇朝直隸州志

隴梅卡

上勾隘

金龜口

琴乃隘

四邦卡

枯彭卡

巨龍卡

隴葵山

隴陳山

坤甯卡

琴倫山

弄懷卡

大隴山

那廩隘

天全隘

隴蓬卡

榮勞隘

葛麻隘

邕賴卡

凌望卡

管帶健字右營都司覃佑啟駐紮左營外委同駐

德業卡

凌條卡

鎮邊縣

照陽關

弄蓬卡

平孟隘

礮台一座

分統營務處參將陳世華駐紮

右

平卻嶺

營千總同駐

弄依山

下惠界

札門口

坡利卡

魁來卡

弄木嶺

崗隆隘

礮台一座

通天卡

坡腳卡

上隆卡

剝淦隘

上下界隘

礮台一座

欄杆卡

剝堪隘

怕懷小隘

馬卡

怕懷大隘

那坡卡

面梁卡
礮台一座

者欣卡

者賴卡

苟筐隘

谷松隘

津梁

潤橋在太平街下文廟巷口嘉慶二十三年知州宋慶和捐廉率衆於大街濠上建潤橋週圍疊石跨以鞏橋餘錢十千歲收息錢添置水桶歲冬淘去塞橋淤漏穢草常注水不竭以備不虞

龍門橋又名五里橋在南門外康熙年間勅建乾隆二十三年知州黃叔顯率州人重修

三元橋在南門外十里道光十四年紳民共建

東門橋在東門三里許紳民共建

龍拱橋在西門外乾隆四年重修

涖門橋在州城南一里

鎮邊縣

利濟橋在縣東南一里乾隆三十一年通判劉思誠建同治年間重修

永濟橋在北街邑人黃猛勅建又呼爲黃猛橋光緒二十年邑人張志遠等倡募重修改今名

南橋在南街

卧虹橋在縣北里許

龍泉橋在縣北半里邑人張碩文建今廢

湖潤司

南陽橋在舊街前道光四年紳民共建

青龍橋在街南光緒十五年巡檢唐應欽率紳民共建
多福橋在街西光緒十五年巡檢唐應欽率紳民共建

下雷土州

強橋道光二十八年土官族目與紳民共建

迎喜橋光緒七年土官族目與紳民重修

同福橋光緒十五年土官族目與紳民共建

晉福橋光緒十三年土官族目與紳民共建

樓亭

懷遠樓在州署左側乾隆五十九年知州李憲喬勅建登高

望遠附郭山川厯厯在目足覽一州之勝此外又有皇華亭
嵌瀨亭安湖亭在大龍潭挹翠亭半山亭在賓山寺四象亭
在太極洞次山閣在郎家墟皆詳載山川志知州顏嗣徽題
懷遠樓對聯云每望京華依北斗欲規邊塞靖南交

塚墓

尙官張天宗墓在舊州城東其原卽那簽所屬

土官岑瑾墓在櫟贊之原

土官岑瑯瑄墓與瑾原連二墓遺蹟尙存

岑土官墓在果老墟西嶺石鼓麒麟至今尙存其名無考

李子叢墓在武平良村後人爲之刊碑

歸順直隸州志卷三

7
風俗志

附氣候

昔日風俗之美者則曰通德里曰高陽里曰鳴珂里地以人
傳人亦以地傳也趙甌北前守鎮安稱郡屬民樸少訟風尙
近古欲久守此邦而猶恐無此福分亦可謂揚詡之至矣以
余觀之前之醕樸漸變澆漓竊恐有江河日下之勢士爲四
民之首要當務實敦本宏遠器識以爲移風易俗之倡幸勿
使寢流爲勝母朝歌哉

元旦未明時家家提甕汲新水先烹茶次點香燭列大糴年
糕米花果物拜天地祖先及父母尊長畢紳耆詣官署稱賀

歸川
然後比閭互相拜賀其四鄉敲竹筒或拖竹枝大喊歸欄謂之收牲畜魂

上元節城中各社神皆於十一夜起設彩張燈耀如白晝吹笙擊鼓喧闐終宵十三晚團飲元宵酒宴後各爲魚龍曼衍之戲煙火彌天觀者塞途至元宵止誠足以鼓吹休明云

清明前後拜掃墳墓染糯米成五色蒸熟供獻光彩異常取山精邪祟不能奪噬之義祭畢席地團坐將所獻簋盤菜葷飲啖復焚香楮拜跪依戀不舍至斜陽在山始歸是猶稍知追遠者歟

四月八日採野外藤葉數種氣味辛苦能避瘴解毒者和以

糯米搗爛爲糝蒸熟分甘舉家食之俗謂之選雜磨把相食此可少疾病云

五月五日家家懸艾虎挂蒲劍飲雄黃酒以避癘疫

七月十四日俗尙燒包先於初十十一兩日預備冥衣金銀列於香火堂前日夜炳燭並獻果品十三日牲酒迎神次日仍多備酒饌祭祖禮畢燒包十五夜另備冥衣施孤撒水飯於門外城鄉皆然惟武平一帶不用冥衣但奉神蓋亦仿謝梅莊先生之意云

中秋節午後家家祭祖入夜拜月啖芋食餅其書館客舖皆設宴賞月是夜拇聲四起幾及達旦

霜降前一日州城各戶裹糶謂之迎霜糶節期燃燭燒香供祖先給小孩四鄉亦作糯米糞謂之洗鎌推原其故蓋幸登場事竣也

十二月二十三小除夕果蔬酒饌送竈神除夕祭祖辭歲禮亦如之三更後迎竈卽選吉時迎喜神

州城迎春極爲熱鬧未迎前一日誠計兩甲老少男婦預先縫新衣看春於黎明後各攜幼男幼女裹帶餽糧絡繹來城集於東郊五六千人其紙龍獅子均於是朝喧鼓鳴鑼紛至沓來先向州衙恭候俟官起輿踴躍擁後除前導儀仗外武營又送兵護衛弓箭鎗牌馬對玉馬各軍牢擺隊齊整至春

亭後祭芒神畢春官與春牛先行看春男婦手擲棉花子謂
之打豐熟仍俟州官起輿如前紙龍獅子隨所護輿喧鬧入
衙叩賀舞抃官賞大封仍到各衙門叩賀春臺亦然薄暮始
散

每屆閏年四鄉建醮功果完滿之日道士使人搖七星旂吶
喊在前引導挨戶禳蕩驅邪猶有古風逐疫之意其城內各
廟按年輪建大醮周而復始禮亦如之

婚娶不尙侈靡聘金至重無過制錢三四十串次則十六二
十其禮物隨金多寡爲數悉用檳榔茶鹽米花脆粿雀蛋紅
蛋等類宴客之筵恒用六碗四盤男客則請赴朝席女客請

請晚席隨帶賀儀親送惟女客在席下多食皆以手帕包回
義取歸貽翁姑及童稚習以爲例徧處皆然其嫁匱士錦被
面決不可少以本鄉人人能織故也土錦以柳絨爲之配成
五色厚而耐久價值五兩未笄之女卽學織

喪事鄰里親友弔唁卽爲經理謂之坐夜送殯之日男婦皆
首裹白巾雜沓街巷出郭而返亦有送至山場者忠厚之風
於此猶見一斑

凡初生子親戚悉以雞黍相饋彌月之期爲兒翦髮則以五
色糯飯紅蛋分送親戚兼設酒招飲其外家隨涓吉日親至
婿家密縫襪襪衣服單夾抱裙並銀鐲項圈帽花以予之周

歲親戚又送鞋襪手鐲等物隨即置酒酬謝惟道光末年彌月酒筵競尙侈靡近則節用十簋內有一簋燒雞名曰薑酒殊儉合古風

新童入學前因紅案束脩一款寒士苦於籌措俗有當田之譏自前州主黃公詠沂將瑞任開設聚秀試典之息撥歸紅案動用通稟勒碑以垂永久州人士遂無此累惟道光末年採芹喜酒亦尙侈靡近則合古風其選拔中舉朝考會試仍照親疏情誼量加贈資又非從前吝嗇矣

士知廉恥鮮有包攬詞訟出入公門及拜門夤緣者間或不
知自重則鄉黨恥之親戚笑之骨肉嗔之故訟師少而士習

頗端

婦女悉敦樸素不飾鉛華惟布衣勤浣至潔而已然多信巫覡遇有疾病輒令禱禳酣歌于室此風牢不可破

西北二鄉各墟半係隆安左州寄籍當三月三日酬神時有放火炮之舉先用紙紮作香亭三座分成一二三號皆飾以人物花草施以丹鉛金箔務令光怪陸離再作紙炮三個大幾如臂以篋圈安置炮上點放其炮則火氣冲起篋圈飛入霄漢及落地時搶得圈者則隨所得之圈以香亭及錢賞之頭號五六千一二號三四千三號二三千得者供奉香亭若神明旦暮焚香以此錢作本生意暢旺買賣均有進益家口平

安至次年放炮時仍將本錢奉還廟上凡欲得是炮者類皆
廣託親友三四十人翹首攘臂以代搶取故放炮之日遠近
畢至少長咸集幾二三千人

本鄉語言咸操土音與思恩慶遠南甯等處各土音略相近
似惟對遠方客人交談則用官語對答故間有終身不諳客
語者至廣東白話人多能說查州屬各家祖籍係廣東居多
緣有大街會館此其明驗也

婦女多好染紅黑牙齒一經染後沒世不脫此蓋地近交夷
尙沿其陋習歟

舊俗四鄉婦女多半短衣長裙自同治初年後穿著漸如客

皇州直隸州志
卷之三
三

裝今之短衣長裙者幾希矣

四鄉民屋皆作兩層名爲欄房上層用板鋪滿人口所居下層安置牛豕既免另作牢圈亦且易防盜竊雖糞穢薰蒸但生長於此居之泰然並不覺其氣臭之難堪也

城中悉飲井水其味微甜與河水異徧處皆可鑿井深掘丈餘即有泉如遇婚嫁請客半取河水煮茗至洗滌衣服輒向大河馬頭漂之故多皎潔浣布亦然

鄉村中婦人或有不得於夫或妻妾爭寵因詣道巫求符以取容悅久之遂變爲蠱時時常隨其身朔望輒放以毒人如外人無可毒即家人六畜亦必毒之否則蠱餓索食無已本

身不安被其蝨者或咽喉腫脹不能吞飲或面目全黃日就羸瘠或臂間有積物咳嗽時作醫而瘳者有之不瘳者亦有之甚可恨也此風鎮邊縣尤甚

州屬自兵燹後茅屋大半每遇回祿親戚恆贈錢米以周其難鄉間遭此亦不須沿門告貸自有寄米相濟者頗重周急之義

牛魂節每年至五月二十內耕耘已畢選取吉日共作牛魂節假如一家有四人即殺四雞煮糯米糯米仍染五色以五色蒸熟合雞用大葉子包各人自帶到平時看牛處至午刻各人相食仍另以糯米飯包一大包灌牛食以酬其耕作之

勞因名牛魂節

嶺南風俗多古樸凡婦人年五十以上者均穿短衣長裙其形似鳳亦頗好看

下崗墟每值醮期於菩薩出遊後一日各人虔製冥衣金銀財帛等件到廟前各擺一檯焚香點燭名曰祭祖此風自古已然

城鄉皆無石碓四境不聞舂聲謂恐舂動龍脈只用杵臼手持擣米用力甚艱然不尙便捷機巧雖拙猶有古風也

鎮邊縣

元旦前一夕夜將闌民家各持火炬提甕汲新水意取滌除

舊也汲而轉沿路唱牛羊豕犬雞鴨六畜魂來一語抵家盥
手烹茶點燭香列油團米花糴饗果蔬酒饌拜天地祖先父
母畢紳耆詣官署稱賀然後比閭互相拜賀是日裸民羣至
官署吹笙唱歌跳躍戲舞名曰祝年豐官賞花紅酒肉歡飲
而散

元宵前後以大糴酒穀祭土神雜坐祠前共飲唱土歌以祝
太平

正月底採白頭翁艾草和米爲糝益以魚蝦祭畜欄名曰收
鴨魂

三月三日染五色飯割牲煮酒男婦咸出墓以石灰塗塚以

紙錢挂墓前飲食而歸

五月五日折艾插戶飲雄黃酒以辟厲疫

六月初旬染五色飯宰豚分烹祭牛欄用雞鴨饋親戚以酬勞牧童男女用小雞五色飯詣田野牛寮內團坐而食曰收牛魂

舊俗七月間甲崗約期祭青苗烹豚煮酒名曰食新米

七月十五日備果蔬酒饌冥衣紙錢祭先祖

八月十五夜闔室聚飲謂之慶團圓

十月送寒衣祀外鬼

十二月下旬設果蔬酒饌迎送竈

除夕烹牲裹大糗可一二升米有實以整豚雞鴨者祭祖辭
歲或用雞卜定來歲之豐歉

婚嫁先託媒通言卜之既吉具果盒送女父母乞允行聘用
檳榔鹽茶米花油團豬雞聘禮稱家貧富請期而娶婿家戚
友或遺豬酒花紅或助銀錢酒米女家戚友贈手鐲手巾戒
指或置衣服襪被及期無所爲莫雁親迎惟士族富家備綵
轎迎新婦或親迎若土民得庚帖或憑雞卜或釀酒驗甘苦
以決成否用檳榔五色飯雞酒豬牛爲聘及期婿抵婦家名
曰回門聚戚族歡飲薄暮先歸新婦隨其親族踵至亦無綵
轎鼓吹花燭合香諸儀

一家遭喪比鄰共爲哀卹視其棺殮則慰喪主食之粥然後
即安及葬亦咸相扶助戚友聞訃香燭以弔至戚供素飯名
曰幫齋士族富家殯之前一日用豬羊羹飯祭之復設雞黍
祭墓頗循禮節尤有古風

縣屬鮮訟獄盜竊奸宄性情鄙野民知畏法敬官聞騶唱聲
即起雖有事田間必輟犁竦立風俗勤樸雖有豐年未嘗侈
食費用春耕通力合作田畝多少勿較也秋收亦然田無頃
畝亦不計埜惟論種數每穀十斤名爲一吊男女衣服與歸

順州略同

湖潤

風俗與州境同

下雷土州

下雷五甲婦女所著衣服上節衣長九寸領袖俱堆五色線下節用布幅圍頭巾白質黑章髻如田螺又以銀釵數枝斜簪其髻多赤腳後髮剪齊此雖固陋實不忘本也

下雷每年到霜降之日趕墟約有數千人男女混雜晝夜不息委吏日照例彈壓以免滋事

氣候

考州境漢屬牂牁郡與滇南接壤其氣候亦大略相似夏無大暑冬無祁寒四時冷暖均勻四境皆山且多洞壑易於興

雲致兩地近南交間有雪霰絕少棉雪冰雹稀見間亦有之
盛夏早晚皆著袷衣紗葛罕服隆冬亦不需重裘薄裘即足
溫體夏多雨水秋頗亢燥掘地丈餘即泉戶皆有井溼氣最
盛時有瘍子病證疫瘧瀉痢等疾居民頸多匏瘻亦偶中蠱
毒飲水必以河水爲佳食鹽必須漉盡渣滓飯食忌傷飽麪
食忌貪多則養身之要旨也